



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 3

Barcelona captain Sergi Roberto-i club toktsüogo

Bangladesh nung minorities amakba aitsür: Priyanka Gandhi



VOL. XXI ISSUE NO. 301 (ADOK 301) DIMAPUR SANGTENNÜ (TUESDAY) LUROI (AUGUST) 13, 2024 ₹ 5.00

Akumen Village Council-i jangjatsür NSACS-i HIV & AIDS atema IEC campaign 2024 tenzükogo

Dimapur, August 12, 2024 (TYO): August 10, 2024 nü Akumen nunger Moakaba-i Saring nung arishi küm 4 tanur tetsür ka dak tashiyim inyak ta Hornbill TV aser social media nung sangdongba atema Hombarnü Akumen Village Council-i Moakaba maitsü jangjatsüogo. Moakaba-i Akumen yimtsüing tenüing menüksüba atema tapet temerenshi agütsütsü ta parnokisa shiogo. Moakaba ya Akumen nunger

masü aser pa tebu ya asür Thapa (Nepali) liasü. Pa tetsü ang Akumen nunger lir ta Village Council-i sangdong ka nung ashi. Onoki iba tatalokba khukhua aitsür aser shia meteterem aliba loktiliba nung iba mapa kodanga magizüktsü. Onoki tanutsüla aser lar kibong atema sarasademtsür aser ozüing amertem dang Moakaba nem temerenshi tesashitaba agütsütsü akhanger ta Akumen Village Council-isa ashi.

Kohima, August 12, 2024 (TYO): Nagaland State AIDS Control Society (NSACS)-i Hombarnü Kohima nung "Intensified IEC Campaign 2024" tenzükogo. Iba campaign ya nübortem den HIV & AIDS indang osang prokshitsü atema lir aser Health & Family Welfare minister P. Paiwang Konyak lia tenzük. "Sorkar agency balala, non-governmental organizations, lokti lenirtemi, educators aser media-i asenok nungiter" ta Minister Paiwang-i ashi. "Bangdakpur ajaki alizüing atongtsü atema külemi inyaker. Loktiliba nung kija shiai iba mapa nung shilem agitsüla aser yamaji inyak nung dang temelenshi bener arutetsü" ta pai ashi. Iba campaign ya ita ana agitsü aser Nagaland kübok district ajunga nung agitsü. Nübortem dang HIV & Sexually Transmitted Infections (STIs) indang osang meteta lidaktsütsü atema National AIDS

Control Organization (NACO)-i iba campaign ketdangtsüa agir. "Osang shiai temelenshi bener arutsü anungji nisung ajaki HIV & AIDS indang osang prokshitsü ayongzüker" ta Health & Family Welfare Commissioner & Secretary V. Kezo-ia ashi. "Tanü lanurtemi tim lemtet agiba ajanga nenok tarutsü yangerttsü. Iba ajanga nenok temang aser tekolok ajangzüksü aser pelaa alitsü. Nü sasa na anepaluang" ta Kezo-isa ashi. Tanü iba sentong nung Minister Paiwang-i NBCC Convention Centre nungi Nagaland Legislative Assembly (NLA) junction tashi rally tenzüktsü. Kaketshirtemi "Be Agent of Change," "Stop HIV," "Get tested- Know your power," "Say no to drugs," "Let us stop HIV & AIDS together" amala tezülubatam amer shilem agi. District Administration aser Village Council den yaritepa Intensified IEC Campaign ya

yimtsüing 780 atongtsü nükjidong lir NSACS-i metetdakttsü. Yimtsüing jenjang nung folk performances, school outreach programme ajanga HIV & STI osang prokshitsü. Village Health, Sanitation, and Nutrition Day (VHSND) nung IEC materials alemtsü aser Interpersonal communication (IPC) sessions agitsü ta NSACS-isa ashi. Urban jenjang nung Youth convention agitsü aser ibaji Kohima Zone nungi tenzüktsü. Iba mapang RRC züngsem aser district 7 nungi nodal officers nem HIV ambassadors indang training agütsütsü. Maneni, Government Hospitals (State & District level) nung special camps ayonga agitsü aser Ombudsman & Complaints Officers nem HIV and AIDS Act 2024 metetdakttsütsü. Facebook, X, YouTube aser Instagram amala social media sabangtem ajanga HIV awareness lemsateptsü ta NSACS-isa metetdakttsü.

Watsü Mungdang-i kukua aitsür

Mokokchung, 12th August (TYO): August 10, 2024 nü Saring yimyak Akumen nunger Mr. Moakaba Aier arishi küm 33 tain kadi tetsür chanu arishi küm 3 (asem) tanur ka dak tashiyim amshia mapa tamajung inyakba asoshi Watsü Mungdang-i kukua aitsür, ta WM sangdong ka ajanga metetdakttsüogo. Iba osang angashia Watsü Mungdang-i jala aser tsürabur den oa ajurutepa tatalokbatem tatongi asüngdangtepa liasü. Nisung mulungsentsü adener kadi iba tashi inyaktsü apitetba yabo kangasa taoksatsüka aser ibai meimchir den külemi sobaliba-a

alitsü metemtsü. Aibelensangji temzüngi melaba ama tapet temerenshi agütsütsüla aser tepuokdak nungi mechioksüla, ta WM-i metetdakttsü. Iba ama mapa tamajung inyaker anema alima ajaki aitsütsüla. Tarutsü nung iba ama mataloktsü aser iba ama nisung madoktsüsa administration aser health department-i asen lima mental health nung temulung agütsütsü tim. Ano maneni asen lima tajungba akümstsü atema ajaki pei tata shilem tajungtiba nung inyaka aotsü ayongzüker, ta Watsü Mungdangisa metetdakttsü.

akhanger nung shilem ka ama August 13, 2024 nü Nagaland kübok district ajunga nung Bike Rally ka alitsü. Dimapur nung asüngnep 9:00 ako nung State Prabhari Anil K Antony-i Super Market nungi Bike Rally tenzüktsütsü.

akhanger nung shilem ka ama August 13, 2024 nü Nagaland kübok district ajunga nung Bike Rally ka alitsü. Dimapur nung asüngnep 9:00 ako nung State Prabhari Anil K Antony-i Super Market nungi Bike Rally tenzüktsütsü.

akhanger nung shilem ka ama August 13, 2024 nü Nagaland kübok district ajunga nung Bike Rally ka alitsü. Dimapur nung asüngnep 9:00 ako nung State Prabhari Anil K Antony-i Super Market nungi Bike Rally tenzüktsütsü.

BJP-i 'Har Ghar Tiranga' campaign tenzükogo

Dimapur, August 12, 2024 (TYO): Bharatiya Janata Party (BJP) Nagaland-i Hombarnü Dimapur nung 'Har Ghar Tiranga' campaign tenzükogo. Tanü City Tower nungi Dhobinalla adena Thahekhu auto stand tashi linük wako lemsa senzüogo. Dimapur nung sensotem nem linük wako lema agütsü aser District Presidents, District Morchas o Mandal Presidents dangi yokogo. Dimapur nung Flag Distribution sentong nung National Secretary & Prabhari In-

charge of Nagaland State Anil K Antony, State President Benjamin Yepthomi, Tribal Affairs & Election advisor Tovihoto Ayemi, National Mahila secretary Aienla Jamir, State Office Bearers, State Morchas, State Social Media aser Dimapur District President den ketdangpurtem aden. 'Har Ghar Tiranga' campaign nung shilem ka ama August 13, 2024 nü Nagaland kübok district ajunga nung Bike Rally ka alitsü. Dimapur nung asüngnep 9:00 ako nung State Prabhari Anil K Antony-i Super Market nungi Bike Rally tenzüktsütsü.

AKM aser JKM-i tanutsüla atema temeten meshir

Dimapur, August 12, 2024 (TYO): Ao Kaketshir Mungdang (AKM) aser Japukong Kaketshir Mungdang (JKM) ajanga sangdong balala nung August 10, 2024 nü Saring yimtsüing nung tanur tetsür ka dak tashiyim mapa inyakba khukhua aitsüba metetdakttsüogo. Iba ama tejashi aser khuret mapang ka nung AKM-i tanutsüla aser lar kibong den külemi noktaker aser temeten mangu tashi nungita yaritsü nanzüker ta AKM-i sangdong ka nung ashi. Iba tesempatsü mapa ya NSCN (Khango) nung Sergeant Major Moakaba (Nepali)-i inyak aser ajaki aitsütsüla. Ozüing tapet kübok pa nem temerenshi tulu agütsütsü onoki akhanger kechiyong tai maketba tanur ka dak kongshiba asoshi temeten agütsütsüla. Ozüing shitak

benshia asen tanurtem aser loktiliba kümzüka ayutsüla ta AKM-i ashi. Kija mesüra telok kari danga Moakaba (Nepali) bail nung agizüktsü merangra ibaji Aor anema inyakba mapa ka aser ozüing alema inyakba pusemer ama züngshitsü. Iba nisung kümzüka ayutsü merangertemji pai inyakba mapa pusemertem ta ashitsü aser timtem ajurutsü ta AKM-isa kümdangtsü olen ka shiogo. Non-Naga nungeri Naga nung tenüing amshia ozüing alema mapa inyakba atema shisabulua bilemer. Iba ajanga Naga nunger ajak asoshi maaksü bentsür arur aser akhüm meketdakttsür. Iba tatalokba ya asenok atema tansütsü ka südakttsü kechiyong asenok maitsü kanga senti lir aser asen maitsü tim mesüi amshitsüpur dang nungi

kümzüka yudi ta AKM-isa ayongzüker. August 10, 2024 nü ozü jala arisih küm 4 dak Sergeant Major, NSCN-Khango Moakaba-i tashiyim inyakba khukhua aitsür ta Japukong Kaketshir Mungdang (JKM)-i sangdong ka nung ashi. Tanur ka dak tesempatsü mapa inyakba ya magizüker. Loktiliba nung yimjung aser putepa alitsü merangba mapang ka iba ama tesempatsü mapa ajanga timtem bentsür arur anungji ozüing amertemi aibelenertem nem tapet temerenshi agütsütsü ayongzüker, ta JKM-i ashi. Kaketshirtemi tanutsüla aser lar kibong den tejashi lemsateper aser tangatetba shitak alir ajaki iba amala mapa aitsütsü aser temeten bushitsütsü ayongzüker ta JKM-isa ashi.



Nagaland Lok Sabha S Supongmeren Jamir-i August 12, 2024 nü Embassy of Ireland, New Delhi nung Deputy Ambassador of Ireland to India Raymond Mullen den ajurutepdang agiba noksa angur. Iba senden nung tenati sobaliba aser inyaksangshi indang lemsatep aser tarutsü nung inter cultural exchange mapa inyaktsü nungdakba lemsatep. Supongmeren aser Raymond nati maparen balala nung aser talisa Agro based sector nung amalitep lia aser yaritepa inyaktsü lenmangtem bushiteptsü mulungtepa jembu.

ED-i Nagaland PWD contractor 2 indang kiojen sota ayur

New Delhi, August 12, 2024 (Agencies): Enforcement Directorate (ED)-i Nagaland PWD department nung contractor ana indang Rs 96 lakh alang kiojen sota yuogo. Kohima nung High Court Complex yangludang tenati public sen tim mesüi amshiba ken o atema iba ya inyak ta ED-i Hombarnü ashi. ED-i bushisüngdanga arudang tai tonglokja aliba contractor anati ozüing alema mapa inyakba, sorkar senpong

asoshi takoksa bentsür aruba aser tim masüba sen agiba kulitem ngutetogo. Central Bureau of Investigation (CBI) Imphal nung Anti-Corruption Branch-i FIR ka benokba nung ajemdaker ED-i bushisüngdanga aruba sülen Dimapur Sub Zonal Office-i kiojentem sota yuogo. Kohima nung High Court Complex tasen yangluba nung public sen Rs 3.61 crore tashi miimzüka agi ta ED-i ashi. CBI contractor Avituo

Sekhose aser Nagaland PWD Engineer tem- Er. Yapang Jamir, Er. M.I Tongjok Ao aser Er. K Nikato Assumi nunger anema chargesheet ka benok. Parnoki Rs 80.25 lakh tashi miimzüka agi. CBI-isa contractor asem-Thepfusatuo Rio, Mhalelio Rio aser Vibeilietuo Kets nunger anema tanga chargesheet ka benoka lir aser parnoki Rs 29.68 lakh tashi tim mesüi agi. Parnok ajaki IPC, 1860 kübok temerenshi angutsüsa aibelenogo ta ED-isa metetdakttsü.

Longleng nung Gender Sensitive Justice indang awareness ayongzük



Women Police Station Longleng nung August 12, 2024 nü Gender Sensitive Justice for Safety & Security of the Girl Child & Her Ecosystem indang awareness sentong ka ayongzükba nung adener police aser judiciary ketdangsürtem noksa nung angur.

Dimapur, Luroi/August 12 (TYO): Tetsürtem dak sendakba ken o balala, scheme, tayongzükba aser Mahila Police Longleng teinyaktsü mapa dak rangloker District Hub for Empowerment of Women ajanga Sakhi- One Stop Centre Longleng den lungjemer police ketdangsür, constable aser judiciary atema Interactive Session on Awareness on Gender Sensitive Justice for Safety & Security of the Girl Child & Her Ecosystem sentong ka August 12, 2024 nü Women Police Station Longleng nung ayongzükba liasü.

Psycho-Social Counsellor Sakhi- OSC, Longleng, Nyangyunglangla Phom ajanga Sakhi-One Stop Centre indang

rateta ashiba mapang iba centre nung services balala anguba aser itemji komasür agir ta asüba indang jembia liasü.

Timtem ajurua aliba tetsür nem iba centre ajanga legal aid, medical aser police teyari, counselling service agütsüba indang jembidang, tetsürtem asoshi helpline number 181 ya 24x7 amshir, ta lai ashi.

Lai Protection Of Women Against Domestic Violence Act of 2005, Child labour Act 2986 indang jembidang, tetsür aser tanur temi kidang kibong nung timtem balala ajuruba nungi kumzükba ayutsü mechi iba Act ya yanglu, ta ashi.

Laisa legal tsütsü tetsür temeden balala indang rasaa

shia liasü.

Iba sentong nung DHEW, A.Afen Phom-i DHEW Longleng ajanga tetsür nem scheme balala agütsüba indang rateta ashi.

OC, Longleng (Women) Vikobinou-i pela agizükba o jembi aser Crime Against Women and Protection of Children from Sexual Offences (POCSO) cases indang tongmelang agi shia liasü.

DHEW Longleng aser Sakhi-One Stop Centre ajanga Longleng nung tetsür aser tanur indang scheme balala osang prokshiba atema pelaba lemsatapa liasü.

Iba sentong nung menden DEO (PMMVY) N. Sangla Phom liasü.

State Talent Search Examination atema metetdaksür

Dimapur, Luroi/August 12 (TYO): Mathematics aser Science nung sempet tajung aliba lanur tem jangjateta renloktaktsütsü atema aser STEM (Science, Technology, Engineering, and Mathematics) disciplines nung foundation tashi itdaksütsü asoshi Mathematics aser

Science nung State Talent Search Examination (STSE) alitsü, ta Nagaland Board of School Education (NBSE) ajanga sangdong ka nung metetdaksü.

Board indang Golden Jubilee nungtem nung maparen balala inyaktsü sentong yanglua aliba nung

shilem ka ama Performance Assessment, Review and Analysis of Knowledge for Holistic Development (PARAKH), National Council of Education Research and Training (NCERT), New Delhi den longjemer iba sentong ya ayongzuktsü, ta NBSE sangdong ajangasa ashi.

Global Open University Nagaland nung National Anti-Ragging Day amung



Global Open University Nagaland nung National Anti-Ragging Day amungba sentong nung tangokba noksa angur. (Dimapur, Aug. 12, 2024)

Dimapur, Luroi/August 12 (TYO): Global Open University Nagaland nung August 12, 2024 nü National Anti-Ragging Day mungogo aser iba sülen August 12-18, 2024 anogotem Anti-Ragging Week amungtsü.

Awareness aser teyari agütsütsü aser akumtsübotep yimya sübadaktsütsü mechi iba anogo ya amunger.

Higher educational institutions nung 'ragging' (kaketshir mezüngmeshitepba)

yimya azüoktsü asoshi iba sentong ya agir.

Iba sentong nung TGOUN nungi Assistant Registrar, Abhishek Tripathi-i jembidang ragging yagu nisung ka temeden nung aitsüba kisüng masü saka academic environment nunga timtem agütsür, ta ashi.

Iba tebilemstü samadaktsütsü asoshi ajaki shilem agitsü kanga tongtipang lir, ta pai ashi. Kaketshirtem pei shisatsü

amshia academic tsütsü tajungba kumdaktsütsü nükjidong nung University ajanga 'The Menace of Ragging in Educational Institutes' omen nung ajemdaker Essay zülutepba sentonga ayongzük, kong Katijungla Jamir (Dept. of FT) ajanga mezüngbuba, Imnanaro Pongen (Dept. of HM) ajanga tanabuba aser Loinoto (Dept. of HM) ajanga tasembuba jenjang nguteta liasü.

Speaker ajanga House Committee senden ayonger

Dimapur, Luroi/August 12 (TYO): NLA Speaker aser House Committee indang Chairman ajanga August 19, 2024 anüngdang 11:00 ako nungi House Committee senden amentsü, ta sangdong ka

nung metetdaksü. Senden ya Assembly Secretariat nung Committee Room nung amentsü. Anungji Committee züngsem ajak medema arua adentsü ayongzük, ta sangdong ajanga ashi.

HODs tem dang Independence Day passes meshitsü metetdaksür

Dimapur, Luroi/August 12 (TYO): Heads of Department ajunga dang 78th Independence Day anogomung atema August 13, 2024 nü nungi tenzükba office mapang Establishment Branch, Office of the Deputy Commissioner, Kohima nungi invitation cards/car passes meshitsü Deputy Commissioner, Kohima, Kumar Ramnikant,

IAS ajanga metetdaksü. Ano sangdong ka nung DC Kohima ajangasa Kohima HQ nung aliba Head of Offices aser Kohima Sadar (Urban & Rural) kübok Gaon Buras ajak August 15, 2024 nü Nagaland Civil Secretariat Plaza nung 78th Independence Day sentong nung adentsü metetdaksü.

Ketdangsürtem den tepila sentong agi



Dimapur, Luroi/August 12 (TYO): Administrative ketdangsür T.Sulanthung, Chubasanen Ozukum, EAC Kiusam; Chubamongla Kichu, EAC Hq. aser Kudazo Swuro, EAC Hq. nunger den tepila sentong ka August 9, 2024 nü DPDB Conference Hall, Kiphire nung agia liasü.

Iba sentong nung ADC, Kiphire, D. Robin; ADC Pungro, Vekusheyi Rakho; PA to DC, T. Luthong Yimchunger aser Head Assistant, DC Office, Kiphire, Khiungmong nungeri o tatsütsü jembi aser DPDB Kiphire tenüng nung DHO, Kiphire, Sentinungba Longchar-i jembia liasü.

Parnok ajaki item

ketdangsür den külemi mapa inyakdang ajangshibatem lemsatep aser parnok mapang Kiphire District nung mapa tajung inyakba kuli agüja liasü.

Parnoki bendanga agütsür pei mapa takok ngua inyakba atema Deputy Commissioner, Kiphire, Temsuwati Longkumer-i tenüngsang agütsü aser tarutsü anogotem nunga pei lemzüktsüba tesem tasenba nung kasa tanüla nung inyaktsü ayongzükba liasü. Outgoing Administrative Officers temia District nung Deputy Commissioner-i anir ketdangsür aser staff tem dang pelaba lemsatep aser pei nem nungloktsüba mapa tajungtiba nung inyakba asoshi tenüngsang agüja liasü.

DC Kohima ajanga 'Har Ghar Tiranga' atema metetdaksür

Dimapur, Luroi/August 12 (TYO): Home Department, Nagaland nungi shiti aruba ama "AzadiKaAmritMahotsav" sentong kübok "Har Ghar Tiranga" campaign atema Deputy Commissioner, Kohima ajanga teinyaktsü balala totuyuba agütsüogo.

August 9-13 tsüngta nisung ajaki 'display pictures' melentsü aser iba mapang sorkar offices, establishments, schools aser colleges nung linük nisan asong tenzüktsü.

Iba mapang sorkar offices, establishments, schools aser colleges nung Tiranga Pledge agitsü aser selfie upload asütsü, Tiranga Canvas nung shilem agia sorkar offices, establishments, schools aser colleges ajanga nungi ajaki "Har Ghar Tiranga" mesüra "Jai Hind" zülutsü.

District Enforcement Forces aser security agency ajungai sepaia takum samar alirtem aser nüchiso asoshi rarar nem Tiranga akum agütsütsü, ta sangdong ajanga ashi. August 12 & 13 anogotem

District Sports Officer, DEF, security agencies, schools aser colleges nung saisapongertem den rallies/yatras alitsü, telecom agency ajungai nisan asongtsü atema SMS reminder agütsütsü.

August 13-15 anogotem Kohima Municipal Council, Chiephobozou Town Council aser RD Blocks ajunga nung kidang linük nisan asongtsü.

Nisung ajaki Tiranga selfire agir harghartiranga.com nung inoktsütsü.

Iba dak sendakba nung Departments, Schools, Colleges aser Establishments ajunga nung item maparen inyaktsü atema nungdakba mera agitsü metetdaksür, ta DC Kohima sangdong ajanga ashi.

"Har Ghar Tiranga" campaign takok ngua agitsü atema kija, kaketshir aser kilen ajungai shilem agitsü kanga tongtipang, ta ashi.

Maneni department temi kilen shia nisan lemsütsüsa süra Deputy Commissioner, Kohima indang office nung Development Branch nungi meshitsü akok, ta sangdong ajangasa ashi.



August 12, 2024 nü taoba mapang External affairs minister Natwar Singh asüpila sentong nung External Affairs Minister, S Jaishankar aser tangartem adenba noksa nung angur.

PM Modi-i tangagi 11 benbuba I-Day sentong nung jembitsü

New Delhi, Luroi/August 12 (Agencies): August 15, 2024 nü Independence Day anogomong nung Ato kilonser Narendra Modi-i tang agi 11benbuba Red Fort nungi jembitsü. Iba anogomong sentong nung Ato kilonser Modi-i pai aniba sorkar indang tongtibangtiba mapatongtem metetdaksütsü aser 2047 küm tashi nungbo India ya terenlok linük ka akümtsü atema renemba sentongtem metetdaksütsü. Ato kilonser Modi-i sensakertem, tetsürtem, lanurtem aser aluyimertem

taküm jenjang tajungba kümdaksütsü atema rangloker inyakba dak sendakba nung Red Fort nung ayongzükba tongti sentong nung adentsü atema parnoka aika jaoktsü. Taküm iba anogomong sentong nung adentsü atema sensakertem, tetsürtem, lanurtem aser aluyimertem 4,000 jungnüa jaokogo. Osang angazükba agi iba sentong nung adentsü atema jaokertemji telok 11 telemsa lir. Aluyimertem, lanurtem aser tetsürtem jaoktsü atema Agriculture & Farmers Welfare ministry, Youth Affairs ministry

aser Women & Child Development ministry tem nem mapa lemezükja liasü. Iba dak alia Panchayati Raj & Rural Development ministry, Tribal Affairs, Education aser Defense ministry temia iba sentong nung adentsü atema jaoktsüpur list renem. NITI Aayog-ia iba sentong nung adentsüpurtem jaokogo. Taküm iba sentong nung adentsü Paris Olympics 2024 nung shilem agir India nunger saisapongertem-a jaokogo. Red Fort nung ayongzükba sentong nung nisung 18,000 dak tema adentsü.

Bangladesh nung minorities amakba aitsür: Priyanka Gandhi

New Delhi, August 12 (Agencies): Hombarnü Congress party general secretary, Priyanka Gandhi Vadra-i, Bangladesh nung minorities nüburtem, talisa Hindu nungertem, Khristantem aser Buddhist nungertem amakba osang angashia jashir, ta metetdaksü. Laisa, khenpiga atema tentetba sorkari Bangladesh nung minorities kümzüktsü atema inyaksü, ta onoki imlar, ta metetdaksü. Congress General Secretary Priyanka-i X ajanga, terenlok aliba loktiliba ka nung tamangba yimsü, kin, oshi mesüra maitsü nung ajemdaker nisung bendangshidanga züngshiba, anema inyakba mesüra amakba ya tagizüktetla masü, ta metetdaksü. "Tekeraba nung Bangladesh nung tensa tajungba akümtsü aser khen atema tentetba sorkari Hindu, Khristan aser Buddhist yimsü amangertem kümzüktsü aser item yimsü akhümtsübuttsü atema inyaksü onoki imlar," ta lai metetdaksü. Bangladesh nung Sheikh Hasina-i aniba Awami League

metetdaksü. Priyanka-i Hindi oshi agi X ajanga, "Kidanger linük Bangladesh nung minorities amakba osangtem maneni angashia jashir. Terenlok aliba loktiliba ka nung tamangba yimsü, kin, oshi mesüra maitsü nung ajemdaker nisung bendangshidanga züngshiba, anema inyakba mesüra amakba ya tagizüktetla masü," ta metetdaksü. Bangladesh nung interim sorkar lenir, Muhammad Yunus-i Hindu nungertem aser Hindu nunger kaketshirtem den senden ka amentsü ayongzükba lir. Osang angazükba agi, August 5 nungi tenzükba tang tashi nung Bangladesh kübok district 52 nung Hindu aser Khristantem densema minorities anema inyakba tatalokba 205 lir.

sorkar chirepba sülen iba linük nung rara adoka nisung 500 dak tema tepsetogo. Linük tesem balala nung Muslim nungertem Hindu nungertem anema inyakba, kiojen raksatsüba aser Hindu nunger tekülem kitem raksatsüba osang aika lir. Awami League party nung densema aliba Hindu nunger lenir anata tepsetogo. Bangladesh nung interim sorkar lenir, Muhammad Yunus-i Hindu nungertem aser Hindu nunger kaketshirtem den senden ka amentsü ayongzükba lir. Osang angazükba agi, August 5 nungi tenzükba tang tashi nung Bangladesh kübok district 52 nung Hindu aser Khristantem densema minorities anema inyakba tatalokba 205 lir.

Bihar nung tekülem ki ka nung nisung 7 ajemset

Patna, August 12 (Agencies): Amongnü ayaterm nung Bihar kübok Jehanabad district nung Baba Siddhnath tekülem kidang nisung tenet ajemset aser nisung teku yiruogo; security sepaitem mapang shidak nung iba tesemji tonga aoba ajanga dang tensaji aziükteta liasü, ta Hombarnü District Magistrate, Alankrita Pandey-i metetdaksü. Tenük kuli alirtemi ashiba agi, Amongnü aonung 11:30 ako meta tekülem kidang naro ayoker ka densema nisung kar mangatettep adoka rara tenzükba sülen tekülem kidangi arur lokti jenshiba mapang nung nisung tenet ajemset. SHO Jehanabad, Divakar Kumar Vishwakarma-i, "Iba tatalokba nung nisung tenet

ajemsetogo. Onoki tasü mangtemji ajak maitsü jangjatsü merangdar, iba sülen tasü mangji post-mortem agitsü asoshi bener aotsü," ta metetdaksü. Iba osang angashia Bihar Chief Minister Nitish Kumar-i mangyim jashi lemsatsep aser iba lendong nung asürtem kibong shia nem sen lakh pezüzü (4) agüjang ta tuyu. Chief Minister-isa district administration dang iba tatalokba nung yirua alirtemji tajungtiba nung anepalua treatment agidakjang, ta tuyu. Taoba ita Uttar Pradesh kübok Hathras nunga yimsü dak sendakba sentong tuluka nung tetsür teimba ser nisung 121 ajemseta liasü.

Mamata-i aibelenertem aputsü atema police nem anogo züngzüktsü



Tawa Kolkata nung aliba hospital ka nung doctor ka tashiyim amshia raksatsür tepsetba anema August 12, 2024 nü AIIMS Delhi nung doctor temi longkak aitdang tangokba noksa nung angur.

Kolkata, August 12 (Agencies): Kolkata nung aliba RG Kar Medical College & Hospital nung arrshi küm 31 doctor trainee ka tashiyim amshia raksatsür tepsetba anema linük tesem ajaklen doctor temi longkak sashia aitba mapang Hombarnü West Bengal Chief Minister, Mamata Banerjee-i, Amongnü, August 18 tashi nung police-i aibelenertem meputetra iba ken o ya CBI nem agütsütsü, ta metetdaksüogo. Iba tatalokba ya tejashitsüka aser taoksatsüka lir, ta shia Mamata Banerjee-i, "Ni police dang, takoksa angular medemertem süaka tangartem süaka nisung kar dak melung melemra parnok ajak dang asüngdangyatsüla ta shiogo," ta metetdaksü. Laisa, "Iba tatalokba bushisüngdangtsü atema onoki azü squad ka, video department aser forensic department yokogo. Kolkata Police-i Amongnü tashi nung iba ken o ya mebentetra onoki iba ken o ya CBI nem agütsütsü," ta metetdaksü.

bushidaksünier, kechiyong ibaji ajanga dang judicial inyakyim kera tenzüktsü. Hospital nung nurse tem aser security sepaitem lia iba ya atalok, ta angashia ni kanga aoksar aser süngmanger," ta laisa ashi. "Takoksa angular tsüraburia, iba tatalokba nung hospital nung inyaker kar densema lir ta kü dang ashiba ni police den-a lemsatsepogo. Onoki iba hospital nung principal, Head of Department, Medical Superintendent cum Vice Principal (MSVP) aser ASP agienogo," ta lai ashi. August 9, 2024 nü iba hospital indang seminar hall nung trainee doctor ka temang nung tarak keta sür lia angu. Post mortem agiba ajanga la tashiyim amshia raksatsüba sülen tepset ta jangaogo. Iba ken o nung tai tonglokja alir, Sanjoy Roy August 10 nü apuba sülen anogo 14 atema police ket nung agüja lir. Roy ya RG Kar Medical College & Hospital den official süabo sendaktepa mali saka pai mapang shia iba hospital sendanger. Tamalen Mamata Banerjee-i nüngdak dak süra aibelener nem tasüba temerenshi obendang agütsütsü, ta metetdakja liasü.



August 12, 2024 nü New Delhi nung senden ka nung Union Minister for Minority Affairs, Kiren Rijju aser Delhi Shia Muslim Personal Law Board nung züngsemtem tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, AUGUST (LUROI) 13, 2024

Tazünger mali ?

Tanü putu nung asenok tsüraburtem asoshi takok aser temoatsü kaji asenok kibong nung tasoba temang kaketrejui yoker, iba jagi tanübo tanurtem ajak tazünger dang kümogo. Ajisüaka, asen state government tamakok aser asenok atema takoksa kaji government school-tem nung tazünger mali kuma aoba ya asütsü. Atangji, tesem kar nungbo government school-tem karbo kanga junga aoba angur saka teimbaka nung tazünger mali, tezüdangtsüka tesayurtem asoshi mapa maka aser government senotsü aika amajok ita sen nung endoker. Item school-tem asoshi memenu dang government-i telemtetba shitak ka agitsü rongdak nungdaka reprangteter. Item school-temji dang masü saka government nung sentong yanglurtemi kanga süoki ia reprangdangtsüba rongdak mapa kaji, government school-tem nung dang masü saka government science college aser technical college, polytechnic, nung dena tazünger maliba tatalokbatem ya asütsü. Tanü alima ajunga nung kaketshirtem asoshi nungdakbaji Science aser mapa inyak sayuba, polytechnic education, ya lir, anungji Nagaland nunga Science aser polytechnic college lapokbaji kanga nungdakwa sentong ka tenzükogo. Ajisüaka, Science college kar nungbo tazünger kata mali aser talisa Govt. Polytechnic Peren nungbo telapok küm 2021 nungi tang tashi tazünger kata marubaji tesüngmangtsüka, iba kuliji government nung alirtemi bushiteta yanglushitsü nungdaker. Atangji, Arts aser Commerce azüngtsübjaja nungdaker saka ano Science azüngtsübjajisa tenüngdaktiba aser ano nübortem nungdakwa mapa kabo inyak metettsüsa Polytechnic nung azüngtsübjajibo Arts, Commerce aser Science azünger ajak atema kanga nungdaker. Tanü asen lima timtemba ya tazünger maliba agi masü saka tazüngertemi shitak mazüngba agi aser shitak azüngtsüsa government nung sentong yanglurtemi lanurtem dang len shitak mesayutetba ajanga lir. Tanü asenok karibo pei chirnurtem asoshi kecha tebilemtsü maliba agi tangar chirnurtem junga mezüngtetba aser zünger mapa manguba timtemtemji kecha hau ta shishia bilema malitsüa akok. Ajisüaka, tang Bangladesh nung atalokba ama asüng asen lima nunga asenok ajak lendong ajurutsüsa ataloktsübjaji lanurtem rongnung kaketshisatsü junga mengutetba aser zünger mapa manguba tebilemtsü nungi tenzüksü. Government nung alirtemi angtettsüba kaji, lanur ka asoshi junga mezüngtetba aser zünger mapa mangubaji tamakok dang masü saka maksü lir, anungji item maksüji aben marem pei taküm samatsüa mapayu ain adoktsü aser tashiyim agi lokti aser yimten anema apusotsü. Asenok atemabo tanüa item lendongtemji paidoktsüsa tapet sentong yanglushia inyaksü mapang lir. Ibaji yimten nung yimsüsür aser ketdangsertemi rajema asen lima nung lanurtem asoshi lapoktsüba school aser polytechnic-tem nungji kibong nung tasor temang kaketshisatsü den mapa inyak kabosa angazükdaksütsüsa len sayua aotsübjaji kanga tongtibang kümogo. Koba lima nung südirsüaka lokti nung rongrongshishi aser makmakshishi adoka yimsüsürtema pei kidang meliteti ajentsüsa atalokbaji nübortem ajungtsü atema masü saka pei kija ajungtsü bilema inyakba ngur lanurtem ain adokdaksüba nungi tenzükba lendongtem asütsü. Ibaji bendanger kintemi jusatsüba aser yanglutsüba ajanga atalokba lendong masü saka asensasa aseni yangluba tensa tia asütsü. Aji oda, ozü chirbo tajung kümerji, kaketreju tajung nung züngdarji, ozübo kiojen aser ali rongsen a jenti alidena lirji, ozübo ajak government mapa nung lirji, ozübo sentsüh maliji, ozübo telok ajak koka amshiteterji ta bilembaji asen atema tanü aser asüng asoshi anisüngzük o masütsü aser tongtibanga masü saka tanü aser asüng asena Tsüngremi moatsüba temoatsü nung ajak den pelatempa linüra, ozübo ta masü, tangar chirnur junga mezüngtetba ya koda ? Ozü lima nung lanurtem dang mapa inyak sayur maliba ya koda ? Ozü lima nung Science aser Polytechnic nung tazünger malitsüsa akümba ya koda ? Nisung aika sentsütsür dang kuma aoba ya koda ? Ozü lima nung telok paikaya tenteta aoba ya koda ? Ozü lanurtem mapa mangu nemzütepba ya koda ? ta asüba tebilemtsütem kotteta langzütettsüla.

OLEMSABANG

KIPOK TESAYUBA BULUA ALIDAK TEKÜMZÜK LIR

~ L. Kika Pongener.

Shisa taka leniba malidak nubur laor, saka kipok tesayuba bulua alidak teküzmük lir (A.Shin-11:14). Kipok sayuba makara nukjidongtem mataloker, saka shisa tajung agutsür aliba agi itumji ataloker (A.Shin-15:22). Kibong nungi tenzükker yimden, arogo aser loktiliba ajunga tashi-ita, longjema, renloka, tejakleni aotsü asoshi kipok sayu-bentsü aser shisa tajung agutsür alitsüla. Kanga tesasatsü-ka, tanü asen lima nung loktiliba ajunga nung meputep, tsükchitep, tarishitep, nukmeremtep, telemsatep agi sunga lir. Itum ajak ya kodaser adoker (?)...ta bushidangra, kipok sayu-bentsü bulua makaba ajanga teimba adoker. Koba linuk aser koba telok nung kipok sayu-bentsü aser shisa tajung agutsür agi anungakonga lidir, iba linuk aser iba telok nungji mepetmesu aser telemsa agi sunga alitsü. Ajisuaka, koba linuk aser koba lokti nung kibok sayu-bentsü ashir aser shisa tajung agutsür aika lidir, idakji yimjung, tesunep aser temeimtep agi sunga alitsü. Aser kipok sayu-bentsü bulua aliba linuk, yimtsüng, kibong nungjagi alima lenir, watsü-wabong, walunir, kenshir-oshir, alimai metettsüsa aser alimai tushitsüsa nungtuko lenir tajung jenti sotettsü aser adoktsü.

Sungdong tajung nung sungjang tajung atangba agi, ozü sangnu, shiruru, mimchirtem anisungzüka, tzüratema, tepok sunga chiyimba ama, lenir tajung adokba jagi alima nem tajangzük agutsütsü, aser konang-nungsang bentsür arutsü. Koba linuk aser yimtsüng nung kipok sayu-bentsü agi anungakonga lidir, idakji aliba yimten, arogo, lokti-tentet kata yimjung nung sunepa malitsü, teti tsükchitepa arishitepa dang alitsü. Iba linuk aser yimtsüngji renloka tejakleni aotsü melena rajang dang akümtsü aser kodanga tangar linuk aser yimtsüng, maparen kecha nunga memenuptsü. Kechiyong nukmeremtepba, arishitepba, tsükchitepba, majinutepba, ibalaji kipok ajunga nung mapang aben bulua jembibaji, kibong nung tanür shia mulungjang nung, tanür asüandang nungi, iba shisatsü tamajungji temulongjang nung jangoker aintsü, aser iba shisatsü tamajung jagi tanür tekolok shisatsüji menendaktsütsü (Brain-washed). Kibong nung tsürabur shirnoki teti atepzüng nung, tangar majung sukshia, tangar tenung asenba, nungsen-bangsen tang jembidir, ibala kibong nungjagi chirnur/semchi-semnur, watsü-wabong, tashi-tawar, kenshi-oshir, alima meimba lenir tajung, alimai züngshitsüsa aser tushitsüsa mesotettsü aser madoktsü.

Ajisuaka, koba linuk, yimtsüng, telok aser kibong nung kipok sayu-bentsü bulua lidir, itum nungjagi alima lenir, alima yanglur, nungtuko nisung alimai metettsüsa aika adoktsü. Iba linuk, yimtsüng, kibong nungjagi chuba menden atema toktepba, sorkar mapa menden tulu atema toktepba UPSC/NPSC/SSB Exam etc. yamala nung takok angur aika adoktsü. Ano kaketshirtem HSLC & HSSLC tatidang nung 'Toppers' aika adoktsü, saisapong aser lenla balala toktepba nung alimai metettsüsa nungtuko lanur tajung aika adoktsü. Ajisuaka, koba linuk aser yimtsüng nung kipok sayu-bentsü aser shisa tajung agutsür agi anungakonga lidir, iba linuk aser yimtsüng nungjagi alima raksar, tansutsü aser tetsübuttsü nisung, kiralongrar, nisung tepseteter, rakzükkraktemer, ashi-auer, tetsür taküm raksatsür, linuk aser yimtsüng nem tenung menuk bentsür arur, mapa tamajung inyaker aika adoktsü. Aji oda, shirnoki indang-indanga, ochi mulungjang, temulungsentsü temeruk agi, nungsen metsümbui, yimten, arogo, loktiliba ajungtsü asoshi kipok nung sayu-bentsü ashir, shisa tajung agutsür, parnokji Tsüngremi balaka moatsütsü aser ajungkettsü. Asenoki nisung nungi masü, saka Tsüngrem nungi maongka angutsü bushidi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tenokdangba liaka Pakistan nung Khristantemi Minorities Day among



August 11, 2024 nü Pakistan kübok Lahore yimy nung Khristantem teimba ser minorities-i Minorities Day anogomong nung yimyim ayima jajadang tangokba noksa nung angur.

Lahore, August 12, 2024 (Agencies): Pakistan nung tenokdangba liaka August 11, 2024 nü Khristantem meyrjrang aika adenshia Minorities Day mongogo.

Punjab province yimtiba, Lahore nung Khristantemi 'tetsübu nungi nüchiso' ta yimyim ayima Pakistan nung Tsüngrem mezüngmeshiba ozüing agientsü takhangba agütsü.

Tensa azüoktsü atema sorkar tetuyuba nung police aika iba tesem jagi yoka liasü.

Rawadari Tehreek (Movement for Tolerance)-i ashiba agi, Punjab assembly kima ghonda 24 longkak aittsü sentong renema liasü saka sorkar ketdangsertemi tesem melenshitsu aser lumia longkak aittsü aliba sentongji thinenang, ta tuyua liasü.

August 10 nü police-i Rawadari Tehreek telok tentetertem rongnung ka, Saeeda Deep aser office ketdangpur ka na apuba sülen ghonda ti tashi police station nungi mechioki liasü.

Nikongdang police-i longkak aittsüpurtem lenmang nokdang aser Punjab province yimtiba, Lahore nung aliba Pakistan National Council of Churches kima adenshia alir nisung 500 shi iba tesem nungjagi meindoka liasü.

Arrshi küm 62, Saeeda Deep-i, "Iba ya tim masü. 2009 küm sorkari Minorities Day sangdonga liasü saka sorkari iba anogo amongtsü memelar," ta ashi.

"Tehreek-e-Labbaik Pakistan [Here-I-Am Movement] teloki August 11 nü agitsü aliba sentongji nokdangang ta tuyu ta police-i ashi. Onok nokdangtsü agibo parnoki item ama ozüing alema inyakba teloktem ang nokdangtsüla," ta Deep-isa metetdaksü.

August 6 nüa Tehreek-e-Labbaik Pakistan teloki Karachi aser Islamabad na nung Khristantemi sentong ana ayongzüka aliba anema ken o asem benoka liasü.

August 11 nü Khristantem densema minorities-i state assembly kima longkak aittsü tebilemba liasü saka sorkari Lahore press club kima nung ang longkak aittsü tuyu.

"Reshikangshi ajangshiba minorities atema ola adoktsütsü asoshi linük temzüng ajanga temeden agüja lir, ajisüaka sorkari item temeden nokdang," ta Rawadari Tehreek chairman, Samson Salamat-i metetdaksü.

Minorities Day nü longkak aitba sentong anema nokdakba asoshi Salamat-i Punjab province minority affairs minister, Amesh Singh Arora aitsü.

Pakistan nung Minorities Day anogomong nung Pakistan tentetsang, Muhammad Ali Jinnah-i 1947 küm August 11 anogo nung jembiba o bilemteta amonger. Iba anogo nungji Jinnah-i Pakistan nung Khristantem, Hindu nunger aser Sikh nunger ama minorities temeden kümzüksü, ta

nangzüka liasü. Minorities Day anogomong nung minister Arora-i, Pakistan nung tamangba yimsü balala amangertem aser tekülem ki ajak kümzüka dang lir, ajisüaka alima sabang nung Pakistan tenüing menüksütsü atema asalentong yanglurtemi takok manguatsü," ta metetdakja liasü.

August 6 nü Karachi nung minorities sentong ka agitsü liasü, saka security tsütsü amokmeren lir ta shia municipal corporation-i iba sentongji agitsü temelaba magütsü. Ajisüaka August 9 nü iba tenokdangbaji agiena liasü.

August 11 nü lokti den jembidang iba sentong ayongzüker Luke Victor-i, "Nisung kari onok temeden nokdangner. Iba ya asen linük lir," ta metetdakja liasü.

Iba sentong nungji Khristantemi Khristmas süngdong terongtu ka amshiba den külemi Pakistan nung Tsüngrem mezüngmeshiba ozüing anema yimyim ayima liasü.

Victor-isa, "Iba sentong ya Tehreek-e-Labbaik Pakistan aser sorkar atema maaksü liasü, kechiyong shilem agitsüpurtem marudaktsütsü atema police-i nokdang. Sorkar ketdangsertemi onok dang Tsüngrem mezüngmeshiba ozüing indang tejembi, ta tuyua liasü," ta metetdaksü.

Pakistan nung nütsüing million 241 lir aser iba nungjagi nütsüing shilem 1.37 dak Khristantem lir aser nütsüing shilem 1.61 Hindu nungertem lir.

ANOGO ABEN TSÜNGREM DEN

ANEMA INYAKERTEM ASOSHI SARASADEMJANG

Saka ni nenok dang shidi, nenok tsükchirtem meimang aser shiri nenok reshikangshidir parnok asoshi sarasademjang. ~ Mathi 5:44

Laishiba nung kija, kibong mesüra telok balala tsükchir süa aliba aser iba ajanga tetsükchitep, mepelatep, aser tesama ajuruba tatalokba otsü aika angur. Saka shirnoki Tsüngrem temeim metet parnoki tsükchirtem danga aochia bilema mapa tajung inyakba angur. Tatishitsü agi, Israel Chuba Sauli aiben Dawid tepsettsü meranga arishia liasü, saka Dawidi pa tsükchir Saul aiben lendong balala nungi kümzüka indang 1 Samuel 24 ff nungi tejangja shia angutsü. Iba yongji Tsüngremi Dawid dak sakloka Chuba rongnung chubatiba kümdaktsü. Yamaji shirnoki tsükchir dang meimtetter aser parnok asoshi sarasademtsüdir Tsüngremi moatsür.

Tanü amangbapurtem aikati tsükchir mesüra reshikangshirtem dang maremzükteti tsükchitepba lira asenoki Tsüngrem dak amangbaji amajok.

Yisu shiba dak aseni amanger pai tsükchir ajak dang tai doka parnok asoshi sarasademtsü. Luk 23:34 Yisui ashi Oba, parnok dang tai tokang, kechiaser parnoki kechi inyaker aji parnoki memetet. Shin O "Shibai tangar nem tatok magütsüteter pai ajanga aotsüba apuji raksar." Alima nung ali tashi asen tsükchirji alitsü, saka nai/ni takoker khristan ta ajatsüsa parnok nem tatok agütsütsü mulungtetdi.

Shin o nung aliba ama Israel anema rara tenzüker asütsüa akok

August 12, 2024: Tesem aisü nungi Israel amaktsüsa tang tensa ka lir; anüdoklen nungi Iran, north tsütsülen nungi Hezbollah, south tsütsülen nungi Houthis aser anüolen tsütsülen nungi Hamas teloki amaktsüsa tensa ka nung lir.

Tang ama tensa ka nung nisung aikati Laishiba nung shinzüka aliba ama Israel anema rara tulu adoktsüa akok ta bilemer.

Ezekiel 38-39 nung Gog aser Magog rara indang shinzüka lir aser Ezekiel 37 nung teret takong agi taküm akümba indang shia lir.

Yaküm October 7 nü Hamas teloki Israel amak, iba sülen Israel-i Gaza nung Hamas anema apusoba mapang nungi tenzüka tang tashi raradar.

Israel-i Gaza Strip nung Hamas anema aser Lebanon nung Hezbollah anema ita trok raraa arudang Israel-i tongbangbo kokdar ajisüaka alima linüktem denbo tesendaktep raksadar, ta aikati bilemer.

Laishiba nung tatembang anogo mapang nung temaitsütem balala indang shia lir aser alimai Israel anema apusotsü, ta shia lir.

Tejen Lai nung Ezekiel tapu-38-39 nung Gog aser

Magog rara nung kin kechaia Israel pu-masemtsü ta shia lir.

Pastor tem aser Lai mongintem aikati, Ezekiel kaket nung shia aliba ya Russia nunger yimsüsür ka leniba nung Iran, Turkey, Sudan aser Central Asia aser Africa linüktem aikati senteper Israel amaktsü indang shinba lir ta bilemer.

Ajisüaka shin o nung shia alibaji, iba ama mapang ka nungji Israel pa kija asütsü aser Israel chichiba tembartemia Israel sendoktsü ta aikati bilemer.

Ano Zechariah ainkaria, tatembang anogo nung kin ajaki Israel anema

apusotsü, ta shia lir.

Tatembang anogo nung alima nung lenirtem ajaki I s r a e l - Y i r u s a l e m tebilemetsü onük ya latettsüla ta bilemetsü, ta Laishiba nung temaitsü sayua lir.

Tasen Lai nunga Yohan-i Jungkai Adok kaket nung tatembang anogo nung kin ajaki Israel anema apusotsü ta shia lir.

Talisa Jungkai Adok tapu 12 nung Yohan-i, kenü anogo Satan alimai ajemzüka yoktsü aser satan-i kintem ajak ashiokja kintemi Israel anema apusotsü aser Yihuda nunger reshikangshitsü, ta shia lir.

Satan ajanga Yihuda nunger aika Israel nungi jenshitsüsa akümtsü aser tangalen jenoktsü ta shia lir. Laishir aikati Yihuda nungertemji Petra region (tang Jordan linük) nung jenoktsü ta bilemer.

Ajisüaka Tsüngremi idakji parnok anogo 1,260 kümzüksü ta shia lir (Jungkai Adok 12:5-6).

Ezekiel 38-39 nung shia aliba Gog aser Magog rara ya asen akumli nung ataloktsü asü mataloktsüar shingaija memetet, ajisüaka tanga alima kintem aikati Israel sendokdar, aser ibaji ajanga shin otem ataloktsü mapang ana nung lir südi ta bilemer.

AO OSHI ANGAZÜKDAK: TANÜ ANGAZÜKTSÜBA OJANG



Taleptep

(v) kanga mazünga mapang (very busy time)

* Onok taleptep tiyalong nung milen sepa adok.

Talepteper

(n) mazünga inyaker (in a hurry)

* Onok talepteper, anungji tangbo marutettsü.

OLONG PAITEP # 6894

Grid for OLONG PAITEP # 6894 with numbers 1-24 in a crossword pattern.

TIPLÉN

- 1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenünga kasa jatapba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasatsüngda jatapba - (4)
14. Pela agizükba tapu ka - (5)
15. Tenünga atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6893 TELANGZÜBA

TIPLÉN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

NAI-A YA METETTER MA



India nung matamabensar tanur 15-i tzuwaba otsu tasen ka yanglutsu meranger aser parnoki Rameswaram nungi Chennai tashi stage balala lemsar kilometre 604 tashi tzu awatsü. Deobarnu parnok Promenade Beach tonga aru aser idangji nubortemi parnok pelaa agizük.

Iba sentong nung Tamil Nadu Fishermens' Association-i yariteper aser Wave Riders kubok 'multi-stage swimming expedition' ya August 5 nu Rameswaram nungi tenzük aser August 15 nu Chennai nung Marina Beach nung tembangtsü.

Arunachal nung Aohali yimtsüngi 'zero hunting zone' sangdonger



Pasighat, August 12, 2024 (Agencies): Arunachal Pradesh nung Aohali yimtsüngi arem shiruru wazüka ayutsü nukjidong nung 'zero hunting zone' metetdaksüogo.

Mebo Additional Deputy Commissioner Sibö Passing aser Idu Mishmi Cultural & Literary Society (IMCLS) lennirtem lia Aohali nungeri iba sangdong agütsü.

Aohali nungeri parnok lushi nung shikariba aser sang ayuba mapa kecha meinyaktsü tezüngzüktep agi. Iba ya talitabong shikariba ajanga arem shiruru kanga ajema akümba ajanga lir.

IMCLS president Dr. Ista Pulu aser general secretary Er. Ere Linggi natia Idu Mishmi nungeri alemli nung arem aser shiruru wazüka aruba indang jembi.

Aohali chairman Sunary Umbrey aser secretary Dinesh Mepola nati nubortem dang arem shiruru wazüka ayuba dang masü saka süngdonglidong wazüka ayutsü tayongzükba agütsü.

Tenatisa forest aser wildlife department dang yimtsüngi conservation mapa inyakba nung nüngdakba teyari agütsütsü ayongzük.

Mebo ADC Sibö Passing-ia

yimdaklir nem tenüngsang agütsü aser shikariba ajanga lipoküm aser meimchir asoshi timtem bentsür aruba indang lemsatop.

East Siang nung Idu Mishmi nunger yimtsüng ka dang alibaji Aohali lir. Iba yimtsüng Lower Dibang Valley district den arrtsü anasa lir.

Iba yimtsüng nung nütsüng yongsük 216 dang lir saka parnoki kanga tasü itta wildlife conservation mapa tenzükogo.

Aohali-i iba 'zero hunting policy' tenzükba ya Arunachal Pradesh nung dang masü saka linük mezüngbuba yimtsüng asütsü akok.

Agartala nung Bangladeshi nunger 4 apu; Meghalaya nunga 7 apu

Agartala/Shillong, August 12, 2024 (Agencies): Tripura Police-i Agartala kubok Nandanagar nung Bangladeshi nunger pezü apu. Parnok ya ozüng alema aruba lir.

Iba tesem nung alirtemi ketdangsurtem dang taitü aketba nisung kar shishilembadak senzüba osang sangoktsü ta Tripura Police-i ashi.

Iba osang nung ajemdaker New Capital Complex Police Station nungi police telok kati mita aodang temulung melemi bilemer nisung pezü apu.

Par pezü ya Abdul Kalam, Kamrul Jaman, Nabir Hossain aser Md. Jubayer ta jangjaogo aser asüngdangya asüdüng parnok Bangladesh nungi ozüng alema aruba nangzük.

Parnok okadaki anir oa ken o benokogo aser police-i parnok ket nung ayutsü mapang meshi.

Tanü Border Security Force (BSF) aser Meghalaya Police-ia checkpoint ka nung Bangladesh nunger 7 aser parnok den yariteper India nunger 2 apu.

Bangladesh nung tensa mejungi akümba sülen Indo-Bangladesh arrtsülen security akangshiogo.

Külen, tanü Tipra Motha MLA Ranjit Debbarma-i Bangladesh nung Interim Government dangi shidi ka zülüogo aser iba nung Chittagong Hill Tracts region nung religious minorities kümzüka ayutsü mepishia lir.

Hindu, Buddhist aser

Christian tem anema mapa inyakba, teka sangshiba, tepsetba, mi agi rongdoktsüba aser auyaba amala taoksatsü aketba osangtem angashir ta Debbarma-i shidi nung shia lir.

Bangladesh kubok tesem balala nung religious minorities-i timtem ajurur aser parnok aika chiyungtsü, tejenokdak mesüra tang nüngdakbatem mangu timtemer, ta paisa ashi.

Chittagong Hill Tracts aser tanga tesemtem nung timtem ajurur aika Tripura, Meghalaya, Assam, Mizoram aser West Bengal anasa arrtsülen jenoka lir. Anungji Bangladesh Interim Government-i religious minorities kümzüka ayutsü atema mapa inyaktsü ayongzük, ta Debbarma-isa ashi.

BJP-i Assam Rajya Sabha menden 2 nung takok angutsü imlar

Guwahati, August 11, 2024 (Agencies): Assam nung Bharatiya Janata Party (BJP)-i Rajya Sabha menden anaprong nung tokteptsü.

"National Democratic Alliance (NDA) nung yaritepertemi onok pusemstü aser menden anaprong nung takok angutsü amanger" ta Assam State BJP president Bhabesh Kalita-i ashi.

Guwahati nung anogo ananü BJP senden nung iba lemtet agi. Senden nung panchayat aser Rajya Sabha elections atema jembi.

Asüng Assam Chief Minister Himanta Biswa Sarma den tongtipang senden ka amentsü lir ta Kalita-isa ashi.

Assam nung Rajya Sabha menden atema züngsem 10 nungi nominations arua lir aser parnok tenüng ajak tatembang

lemtet atema central parliamentary committee dangi yoktsü ta paisa ashi.

BJP ticket meshirtemrongnung taoba Union minister Rameswar Teli, ex-MP Rajdeep Roy, ex-MP Topon Gogoi, MLA Manab Deka aser taoba MLA Mission Ranjan Das nunger dena lir.

"State election committee senden nung Union minister Sarbananda Sonowal, CM Himanta Biswa Sarma aser state in-charge Harish Dwivedi nunger aden aser onoki iba onük lemsatopogo. Tatembang lemtet ka atema parnok tenüng ajak central parliamentary committee dangi yoktsü lemtet" ta Kalita-isa metetdaksü.

Sarbananda Sonowal aser Kamakhya Tassa na Lok Sabha election nung toktepa takok anguba ajanga Assam nung Rajya Sabha menden ana

tazüng aküm.

Assam nung Rajya Sabha menden ajak agi 7 lir aser iba nung BJP-i aniba teloktepi menden 6 nung takok ngua lir. Rajya Sabha MLA temji BJP nungi 4 aser AGP o UPPL nungi kaka lir.

Rajya Sabha menden ka nung Independent MP ka lir. September 2, 2024 nü Assam nung menden ana dena menden 12 atema Rajya Sabha elections agitsü.

Tanü Kalita-i osangbener den jembidang Bangladesh nung Hindu nunger kümzüka ayutsü atema tebilemstü abenba lemsatop.

Bangladesh nung sorkari taseni Hindu nunger kümzüka ayutsü atema mapa inyaktsüla ta paisa ayongzük aser Congress-i iba tebilemstü atema ola madokba atema aitsü.

Myanmar nungi Rohingya nungger aika Bangladesh-i jena odar



Myanmar anüolen Rakhine State nung military aser Arakan Army (AA) tsungta raraba ajanga Rohingya nungger aika yirur Bangladesh-i jena aoba noksa nung angur.

Dhaka, Luroi/August 12 (Agencies): Myanmar kübok anüolen aliba Rakhine State nung military aser Arakan Army (AA) na raratepba ajanga Rohingya nungger aika yirur Myanmar nungi Bangladesh-i jena odar, ta international medical group Doctors without Borders shirok dang MSF ta ajar parnokoki ashi.

MSF-i ashiba agi, Cox's Bazar, Bangladesh nung parnok indang team temi mepetmesü nung yirur arur parnok 39 temang anepaluogo, kong mortar shell aser injang agi yirurtem densema lir. Yirur alirtem rongnung shilem 40 bo tetsür aser tanurtem liasü, ta parnokisa metetdaksü.

Parnok indang clinic nung staff temi ashiba agi, taküm tang mezüngbuba nisung aika kanga mejungi yirur aruba ajangshir.

"Rohingya nungger aika yirur Myanmar nungi jena aruba asadangdar iba mangatetep ajanga Rohingya nungger dak kanga mejungi kongshiba onoki tali süoki ia bilemer," ta Bangladesh nung MSF indang representative Orla Murphy-i ashi. "Myanmar nung tekümzükba kübok aliba tesemtem anogoshia tilaba küma odar aser nüburtem rara teyongsü nung mejeper aser iba ajanga tekümzükba bushia Bangladesh-i jena aotsüsa akümer," ta paisa shisem.

Rohingya nungger ya timba Muslim nungger lir aser parnok mapang talangka Rakhine state nung kanga mezüngmeshia arudar.

2017 küm Myanmar military- i parnok anema jenjang agiba sülen Rohingya nungger 750,000 Bangladeshi-i jena ao aser iba ken o ya tang genocide ka ama bushisüngdang südar. Parnok meyirejang aika camp tem nung tang lirdar, kong parnok senzüsenpong mesademi lir.

Arakan Army (AA) shirnok Rakhine state nüjiso atema rarar, parnok military den rara aliba telungpur teloktem den adenba sülen ita ishika tsüngda state nung raratepba tali kümogo. Myanmar nung telungpur telok ishika senteper military den rara arudar, shirnoki 2021 küm February ita sorkar atsünga liasü.

June tatemi UK nung amendaker Burmese Rohingya Organisation UK (BROUK)-i, Maungdaw jila nung raratep tali akümba sülen Rakhine nung ano Rohingya nungertem samatsütsü asoshi tali merangtsü ta tekümdangtsü metetdaksür liasü. Maungdaw ya Bangladesh den arrtsü nung tzüküm nung aliba jila ka lir, kong Rohingya nungertem aika alir.

Kasa ita rartep tali küma aoba ajanga MSF-i northern Rakhine nung parnok indang health service tem anenja liasü.

MSF-i ashiba agi, Rohingya nungger shirnok teyari bushia Bangladesh-i aoer, parnok Rakhine state nung tensa kanga mejungi küma odar ta shiogo.

"Azütokshi lendong nungi jena aotsü atema ayong adentsü asoshi rong bushiba mapang

nüburtem dak bomb pokloktsüba indang osang metetdaksüogo. Ano tangar kari ayong küm nung tasümgang aika anguba indang osang agütsüogo. Temang manemi alirtem aikati, tekümzükba tesem bushia ajenba mapang kinungertem den pilaba aser mepetmesü nung kinungertem tepsetba indang jembiogo. Maneni nisung aikati Myanmar nung aliba parnok kinungertem aika mekümzüktsü ta tsübua bilemba lemsatepogo," ta kasa sangdong ajanga metetdaksü.

Hopta ka tejakdang drone ka amshia Maungdaw tezülen amakba sülen Bangladesh-i jena aotsü meranger nisung ter dak tema tepseta liasü, ta Reuters news agency-i hopta tatemi sangdong ka ajanga metetdaksü.

Asürtem rongnung mashisa aliba tetsür ka aser lar arishi küm ana tain tanur ka densema liasü, ta kasa sangdong ajanga metetdaksü. Iba inyakyim ya military aser AA napronglai kati ka dang tai tongloktsüogo.

MSF-i ashiba agi, mangatetep nung sabanger aliba nüburtem kümzüktsü atema tangsa tang jenjang agitsü nungdaker.

"Nüburtem taochi makai mamaktsüla aser parnok tekümzükba tesem bushia aotsü atema temelaba agütsütsüla. Kasa mapang nung medical teyari nungdaka alirtem nem kecha tetsükdaksü makai teyari agütsütsüla aser medical facilities tem amshitsü melatsüla," ta Murphy-i ashi.

MOLUNGNEN O

"Shir mulungsentü merükmerüka ali parnok temoatsüba; kechiaser parnokki Tsüngrem angutsü"

Ozüi teti meima aiba Asür **MASANENBA** (Unger), Penli Ward, Mokokchung shiranga aliba mapang aser August 1, 2024 nü asüba mapang nübu, shisatsü, sarasadem aser rongsen agi ozü den yaritepba kija, lokti tentet, tembar, kidanger, kinunger aser temulunger ajunga dang kinunger temi temulung taroktiba nungi pelaba lemsateper.

Onoki item dang alakteta pelaba lemsateper;

1. Mokokchung Town Baptist Arogo (MTBA),
2. Penli Ward Yimden,
3. Unger Senso Telongjem Mokockhung Town,
4. River Plate Association,
5. Unger Baptist Arogo,
6. Unger Yimden,
7. Bendang Ali Unger Seno Telongjem,
8. Longkhum Baptist Arogo,
9. Govt. High School Sumi Mokokchung,
10. Dr. Imsu, Nurses and Staffs, Lemjem Hospital, Mokokchung,
11. Dr. Akhito, Nurses and Staff, Olive Christian Hospital, Dimapur,
12. Dr. Sedevi Angami, Nurses and Staff, Referral Hospital, Dimpur,
13. Dr. Vinu, Director, Nurses and Staff, Patient Counseling Dept. Bangalore Baptist Hospital.

- Temeim kinungtsü, chirnur aser kinungertem.



Ukraine sepaitem Russia telungi 30km shi aitogo: Moscow

Moscow, Luroi/August 12 (Agencies): Ukraine sepaitem Russia arütsü alema kilometre 30 jungnüa aitogo, aser ibai February 2022 nungi tenzüka Moscow-i tashi ajak amshia Ukraine makyonga arudang arütsü alema talangtiba aitba alitsü.

Kursk region nung rara tenzüker troknü bubai ayaoka aidang, sepaitemi Ukraine sepaitem den Tolpino aser Obshchy Kolodez yimtsüngtem nung khatep, ta Russia indang defence ministry ajanga ashi.

Kyiv-i Russia nungger tesunep nung aliba nüburtem mulungjang nung tetsübo aiddaksür, ta foreign ministry odongtar Maria Zakharova-i aitsü.

Taküm Russia-i Kursk nungi arütsü alema 2,000 amak, ta Ukraine Tir Volodymyr Zelensky-i Deobar aonung ashi.

"Artillery, mortars, drones. Missile amshia amakba lir, aser item amakba shia telangzüba agütsütsü langa lir," ta Zelensky-i Kyiv nungi linük den jembidang ashi.

Ukraine-i yariba 'sabotage' telok temi arütsü alema oa amakba liasü, saka Kursk amakba ya Kyiv indang conventional forces tem lungjemer Russian litsü nung amakba rongnung tesashitiba alitsü.

Tsükchir mobile groups temi armoured vehicles bener Russia litsü telungi aitsü merangba tasa onoki raksatsü, ta Russia indang defence ministry ajanga Deobarnü shia liasü.

Ajisüaka Tolpino aser Obshchy Kolodez yimtsüngtem nunga Ukraine sepaitem den raraba defence ministry ajanga ashi, koba Russia-Ukraine arütsü nungi kilometre 25 aser 30 shi aiter lir, anungji Kyiv sepaitem Kursk border region-i aitba parnokkia nangzüker amai

angateter.

Arütsü nungi kilometre 25 shi pilar Levshinka yimtsüng anasa Russia-i amakba video tem online nung prokshir.

Ukraine sepaitemi Kursk region nung nisung aliba tesem aika agiogo ta ashir. Russia litsü telungi kilometre asem shi aiter Guevo yimtsüng nung sepaitemi administrative building ka nungi Russia nungger nisan indokba video prokshia liasü.

Sverdlikovo aser Poroz nunga Ukraine sepaitemi administrative buildings atsüngdokba noksa tem temai adokogo aser Sudzha - nisung 5,000 shi aliba jila nunga kanga sashia raratar.

Ukraine sepaitem Sudzha nung tangokba video prokshia lir, aser iba tesem nungi Ukraine ajanga Russia-i EU nem natural gas agütsür.

Kursk region den arüa aliba Sumy region nunga armoured personnel carriers aser tanks tem Russia tsütsü tanem-tanemi aoba nguogo.

Russia-i Kursk nuclear power plant anasa defensive lines tasen yangluba noksa tema nguogo aser iba tesem atongtsü kilometre 50 shi pilar Obshchy Kolodez nunga Ukraine sepaitem rara liasü.

Kursk region nung arütsü anasa nungi nisung 76,000 anizüker ogo aser yangji aliba ketdangtsür temi state of emergency sangdonga lir, ta Russia-i ashir.

Kursk region yimtiba Kursk nung Honibar aonung Ukrainian missile ka khazüka yokba jana multi-storey building ka nung tsüka nisung 15 yiru, ta acting regional governor Aleksei Smirnov-i ashi.

Iba ya yimjung atema senden noklang ka amenba dang anasatibai anir aor, ta Ukraine nungger MP Oleksiy Goncharenko-i ashi.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

Dated, Kohima, the 12th August, 2024


NOTIFICATION

NO. DTE/ ESTT-2/12/2023-24: This is to inform all the CUET-UG-2024 appeared candidates who have not been selected to any seat, that there will be a Spot Round counseling on 14th August, 2024 at 12:00 pm in the conference Hall of the Directorate Technical Education, Nagaland, Kohima, to fill the vacant seats under State Reserved Seats in Para Medical, Agri & Allied courses.

Interested candidates who have appeared CUET-UG-2024 are informed to attend the spot round selection. Selection will be done on the basis of CUET-UG-2024 merit only.

(Er. VIPULHOU LHOUNGU)
Director.

Paris Olympics 2024: United States-i medal timba angur



Saint-Denis, France kübok Stade de France nung 2024 Summer Olympics shibangba sentong nung France nunger tzuwar Leon Marchand-i Olympics milak keta aliba milen ka bener aoba noksa nung angur.

Luroi/August 12, 2024 (Agencies): United States-i tera agi China ajateta taküm Paris Olympic nung medal timba ngua temaba jenjang nung tembangogo

Anogo 17 asaya balala kanga toktepa asayaba sülen Deobarnü United States tetsür basketball team-i France team 67-66 agi koka iba asayamung nung tatembangbuba gold medal ngua liasü.

USA team-i Olympics nung tetsür Basketball asaya tibenbuba atonga kokogo aser iba asaya akokba ajanga USA team-i China den kasa gold medal 40 ngua liasü.

Ajisüaka USA temaba jenjang nung tembangogo. Parnoki ajak senteper medal 126 angu aser tanabuba jenjang nung China-i medal 91 ngua liasü. Japan-ia gold medal 20

(ajak senteper 45) aser Australia-i gold medal 18 (ajak senteper 53) ngua tasembuba aser pezübuba nung tembanga liasü.

France-i gold medal 16 ngua parnok pongububa nung tembanga liasü, koba parnok asoshi aso ka dak tema nung takok tajungtiba asütsü. France team-i ajak senteper medal 64 angu. France team-i 1996 küm Atlanta nung gold medal 15 aser 2008 küm Beijing nung ajak senteper medal 43 ngur aliba taküm ajatetogo.

Iba asayamung nung India-ia, silver ka aser bronze medal pongu ngua jenjang 71buba nung asayamung tembangogo.

India nunger medal angurtem:

Neeraj Chopra: Silver; Men's Javelin Throw (Athletics)
Indian Men's Hockey Team:

Bronze

Manu Bhaker: Bronze; Women's 10m Air Pistol (Shooting)

Swapnil Kusale: bronze; men's 50m rifle 3 positions (Shooting)

Manu Bhaker and Sarabjot Singh: Bronze; 10m Air Pistol Mixed Team (Shooting)

Aman Sehrawat: Bronze - Men's Freestyle 57kg (Wrestling).

Tokyo Olympics dang nungi tajungba asayatetsü ta timla liasü saka Tokyo nung India nunger asayartemi medal tenet (1 gold, 2 silver, adser 4 bronze) anguba aser jenjang 48buba nung tembanga metongteti liasü.

Ajak senteper iba asayamung nung India nunger asayar 117 asaya 16 nung shilem agiogo.

Saka & James na PFA young player awards atema nominate süogo

Luroi/August 12, 2024 (Agencies): Arsenal nungi asayar Bukayo Saka aser Chelsea nungi asayar Cole Palmer na Professional Footballers' Association men's young player of the year award atema nominate süogo. Tetsürtem rongnungi Chelsea nungi asayar Lauren James aser Manchester City nungi asayar Khiara Keating nata nominate süogo.

Saka, shibai 2022-23 küm iba award nguogo, pai Premier League nung taoba season goal 16 idaktsüba den assist teku sütsüogo pa iba award atema asayar trok nominate asüba nung densema lir.

Chelsea nungi asayar James-a PFA women's young player award atema küm anabuba atonga nominate süogo. Pai taoba season asaya 16 nungi goal 13 idaktsü aser lar team-i Women's Super League akokba nung teyari tulu agüja liasü.

Award angurtem August 20 nü sangdongotsü.

Arishi küm 22 tain England nunger forward Palmer taoba küm September 1 nü Manchester City nung aden aser pai Premier League nung goal 22 idakja liasü.

Pa aser Saka napronglai England team Euro 2024 final tonga asayaba mapang kanga junga asaya liasü.

Kasa mapang nung iba

award atema Manchester United nungia Kobbie Mainoo aser Alejandro Garnacho nata nominate süogo.

Maneni Michael Olise, shiba taküm Crystal Palace nungi Bayern Munich-i ogo pa-a PFA list nung züngoksema lir.

PFA list nung ano Brighton and Hove Albion nungi asayar Joao Pedro-a densema lir.

Tetsürtem rongnung James den Goalkeeper Keating, Chelsea nungi asayar Aggie Beever, Manchester United defender Maya Le Tissier, Manchester City nungi asayar Jess Park aser Tottenham nungi Midfielder Grace Clinton nungera densema lir.



Nagaland State AIDS Control Society (NSACS) tawabangba kübok District AIDS Prevention & Control Unit (DAPCU/DISHA) Kohima-i ayongzüka August 12 nü 2buba marathon race - "Red Run" ayongzüka asayaba mapang ketdangsurtem aser asemtepba nung shilem agirtem tangokba noksa nung angur. Asemtepba nung takok angurte; Tebur: 1st: Sha S-Kohima College; 2nd :Jeet Bahadur- Sazolie College; 3rd: Martemsu Aier- St. Joseph's College, Jakhama. Tetsür: 1st: Hanthula T- Kros College; 2nd: Z. Liyani Ezung- Don Bosco College; 3rd: Kuluthulu- Oriental College.


Nepal cricket team NCA nung training agitsü

Luroi/August 12, 2024 (Agencies): Taruba Cricket World Cup League 2 series atema Nepal cricket team Bengaluru indang National Cricket Academy (NCA) nung training agitsü. Iba asayamung ya Canada nung asayatsü lir.

Canada nung tri-series atema mao tsüngda team hopta ana NCA facility nung taining agia parnok sempet arantetshitsü, ta PTI sangdong ka ajanga metetdaksü. Iba asayamung nung Oman-ia shilem agitsü.

Tang tashi nung Nepal team League 2 standings nung trokbuba nung lir.

"ICC Men's Cricket World Cup League 2 Preparation Series atema renemtsü atema Rhinos pur India-i aotsü. Bangalore nung National Cricket Academy (NCA) nung hopta ana training agiba ajanga asayartem sempet aser tasa tajungba kuma arantetshidaktsütsü," ta Cricket Association of Nepal-i Hombarnü sangdong ka ajanga metetdaksü.



Cricket Association of Nepal


Nepal cricket team nung captain Rohit Paudel, Dipendra Singh Airee, aser Sandeep Lamichhane nunger amala tongtibang asayartem tang Canada nung Global T20 league nung shilem agidar.

T20 World Cup 2024 atema apusoa mao tsüngda Nepal team training asaya kar asoshi India-i arua liasü. Parnok India nung mungzüka mapang Vapi nung Gujarat aser Baroda team tem den asaya liasü.

Nepal team nükdongji 2026 küm December tatem tashi nungbo League 2 table top four nung tembangtsü asoshi lir. Iba nükdong ya ajangzüktetra parnok CWC Qualifier-i indang indanga aitsü.

Ajisüaka team top four nung metembangra parnok CWC Qualifier Play-off nung asayatsüsa akümstsü. Iba jenjang nungi team pezü dang CWC Qualifier-i aitsü.

Barcelona captain Sergi Roberto-i club toktsüogo



Sergi Roberto

sülen tembangogo aser pai pa indang social media network tem ajanga club toktsüba osang sangdongogo," ta Catalan club yagi official sangdong ka ajanga metetdaksü.

"Maneni Catalan asayartemi Auditori 1899 nung August 13 nü tir Joan Laporta dena lia pa den tepila sentong ka agitsü," ta kasa sangdong ajanga metetdaksü.

2017 küm Champions League last 16 nung Paris Saint-Germain goal 6-1 agi akokba asaya nung pai tatembangbuba goal idakja team takok dangi ani. Mezüngbuba leg nungbo France team yagi asaya goal 4-0 agi koker liasü.

"Asaya 373, takok marok 25 anguba aser mamatoktetsüsa goal ka idaktsüba sülen football asayar shiba arishi küm 14 asüdang club nung dena liasü pai tang club toktsütsü," ta Barcelona-i ashi.

Sergi Roberto-i Barca nungi asayaba mapang goal 19 idakja liasü. Club nungi pai Champions Leagues ana aser La Liga titles tenet den tanga takok marok aika nguogo.

Spain nunger international asayar yagi position aika nung asayater aser pa taoba season ishika nungbo right-back ama asayaogo aser nüngdakba position tem nung asaya liasü.

Luroi/August 12, 2024 (Agencies): Barcelona-i Deobarnü sangdong ka ajanga captain Sergi Roberto-i season 14 sülen club toktsüba metetdaksüogo.

Arishi küm 32 tain asayar den tenangzüktepba yanglur aliba ya June tatem tembang aser pa tarutsü dak sendakba nung tang tashi nung kecha telemtetba agia mali.

Midfielder Sergi Roberto, shiba Barca indang La Masia academy nungi anitetba asayar ka lir, pa 2010 küm mezüngbuba first team nungi asaya liasü.

"Sergi Roberto-i pai club officially toktsüba sangdongogo, kong pa career tepeyong amai asayaogo. First team captain den tenangzüktepba yanglur aliba taoba season tembangba

BILEMDANGANG

"Tangar shilem agitsü memerangi nü shilem shitak agiang."